

Islam Di Antara Kejihilan Pemeluknya, Dan Kelemahan Ulamanya

(VI)

“Bahawa kerajaan hendaklah menghukum dengan Hukuman Jenayah di atas siapa-siapa sahaja daripada rakyat negeri yang melakukan kesalahan-kesalahan mengganggu ketenteraman umum, demikian juga kesalahan membuat huru-hara di dalam negeri dengan tujuan untuk menentang dasar pemerintah...”

(Terjemahan bebas oleh: Azmi)

Sebab Dipindahkan Undang-undang Barat

Itu Ke Dalam Negeri-negeri Islam:

Banyak orang menyangka tentang sebab-sebab pegawai tertinggi kebanyakan daripada negara-negara Islam lebih suka menggunakan undang-undang yang diimport dari Barat untuk dijadikan panduan menjalankan pemerintahan di dalam negeri-negeri Islam ialah oleh kerana undang-undang *sharī'ah Islāmiyyah* yang diturunkan oleh Tuhan itu masih belum lengkap untuk dijadikan undang-undang pemerintahan di dalam sesebuah negara.

Sangkaan yang seumpama itu adalah salah, orang-orang yang mempunyai sangkaan yang demikian itu adalah termasuk di dalam golongan mereka-mereka yang jahil dan dangkal pengetahuannya di dalam memahami Islam.

Kalau mereka betul-betul berusaha mengkaji rahsia-rahsia hukum yang terpendam di dalam *sharī'ah Islāmiyyah* yang menjadi dasar undang-undang di dalam agama Islam, nescaya

mereka sendiri akan mengakui tentang kelengkapan dan kesempurnaan hukum-hukum yang terkandung di dalamnya. Umpamanya tinjau sahajalah hukum-hukum *'ibādah, munākahāt, mu'amalāt* dan *jināyahāt* yang tercatit di dalam ilmu fiqh. Di sana akan mereka dapati bahawa segala pokok dan cabang ranting hukum yang diturunkan Allah di dalam *sharī'ah Islāmiyyah* itu adalah penuh dengan adab sopan akhlak yang tinggi, padat dengan budi pekerti yang mulia dan lengkap dengan tata-tertib dan peraturan-peraturan yang sesuai dijadikan pedoman hidup di dalam sesuatu masyarakat manusia yang berbilang bangsa dan keturunan. Kerana agama Islam diturunkan untuk semua bangsa dan untuk semua golongan manusia.

Jika ada orang yang betul-betul mahu mengatur dan mengumpulkan *sharī'ah Islāmiyyah* dengan diperkemaskan kedudukan sesuatu hukum dan dan dipersetujuan cara

pelaksanaan mengikut peredaran zaman maka sudah tentu *sharī'ah Islāmiyyah* itu sesuai dijadikan sebuah undang-undang internasional untuk membimbing seluruh manusia membentuk satu masyarakat dunia yang aman damai dan hidup saling cinta-mencintai di antara sesama manusia kerana *sharī'ah Islāmiyyah* itu adalah merupakan suatu undang-undang internasional yang sesuai digunakan di dalam segenap masa dan setiap zaman. Kalau manusia seluruhnya mahu menyelidik dan memahami segala peraturan dan hukum-hukum yang terkandung di dalam *sharī'ah Islāmiyyah*, maka sudah tentu mereka meninggalkan segala peraturan dan undang-undang yang mereka agung-agungkan, berpaling dan berpegang teguh kepada ajaran-ajaran suci yang dibawa oleh Muhammad (S.A.W.). Sebab-sebab yang sebenarnya maka undang-undang Barat itu dapat menyeludup masuk ke dalam negara-negara

Islam, kemudian berjaya mempengaruhi jiwa orang-orang Islam menggunakannya adalah berpunca daripada kaum penjajah, *imperialist* dan kelemahan para ulama dan pemeluk-pemeluk Islam sendiri.

India dan negeri-negeri yang terletak di kawasan Afrika Selatan dengan mudah dapat dipengaruhi oleh undang-undang Barat yang dibawa masuk ke sana oleh kekuasaan kaum penjajah. Setengah daripada negara-negara Islam yang lain dengan sebab kelemahan semangat keislaman yang terpupuk di dada pemeluk-pemeluk Islam dan para ulamanya sendiri maka undang-undang Barat lekas sekali mempengaruhi jiwa mereka.

Di Mesir dan Turki lain pula caranya, kemasukan undang-undang Barat ke dalam kedua-dua negeri tersebut adalah dari dorongan hati pembesar-pembesar negeri dan pemimpin-pemimpin rakyat yang ingin meniru-niru adat dan cara kehidupan masyarakat orang-orang barat, sehingga keadaan di dalam kedua-dua buah negeri itu dipersetujuan dengan undang-undang negeri yang dibawa masuk dari Barat itu.

Menurut sejarah mula-mula sekali undang-undang Barat diimport masuk ke Mesir ialah pada zaman pemerintahan Khadiwi Ismail. Pada zaman beliau inilah semangat kesedaran untuk memperlengkap dan mempercemas kedudukan hukum-hukum Islam untuk dijadikan undang-undang negeri yang

sempurna dan teratur rapi — mulai timbul, undang-undang Islam yang dikutip dan digubal daripada *sharī'ah Islāmiyyah* yang terkandung di dalam kitab-kitab *al-fiqh al-Islāmī* yang bermacam aliran mazhab dijadikan satu hukum yang sama tujuan dan satu pendapat.

Untuk melaksanakan cita-cita yang baik ini maka beliau (Khadiwi Ismail) pun meminta kepada sekalian para ulama al-Azhar yang terkenal alim dan terkemuka untuk mengatur dan menggubal sebuah undang-undang Islam yang lengkap dan sempurna dengan tidak memandang kepada aliran-aliran mazhab yang empat. Tujuannya satu mazhab baru hendaklah dicipta dengan mensesuaikan pendapat dan hukum-hukum *'ibādāt, munākahāt, mu'amalāt, jināyāt* yang didapati di dalam kitab-kitab *al-fiqh al-Islāmī*, daripada aliran mazhab yang empat dijadikan satu hukum yang tidak ada perselisihan mazhab di dalamnya.

Tetapi sayang! Seribu kali sayang...permintaan beliau itu ditolak oleh para ulama al-Azhar yang dalam jiwa mereka masih tebal diselaputi oleh perasaan taksub kepada aliran bermazhab, dengan sebab adanya perasaan taksub bermazhab ini maka sekalian para ulama al-Azhar enggan memberikan fikiran dan tenaga kerjasama untuk menciptakan sebuah syariat tanpa mazhab di dalam bentuk yang lebih sempurna dan lengkap untuk mempersatukan

kaum Muslimin di seluruh dunia dan menjauhkan mereka daripada jurang perpecahan dengan sebab adanya aliran mazhab yang berlainan.

Telah berkurun-kurun lamanya umat Islam hidup berkelas-kelas di dalam aliran-aliran mazhab yang mereka anuti. di dalam menentukan satu-satu hukum mereka tak dapat bersatu. Setiap pengikut Islam berfanatik dengan masing-masing mazhab. Selagi mereka berpegang kepada aliran mazhab di dalam menentukan satu-satu hukum, maka selama itulah mereka akan tetap menjadi suatu umat yang sentiasa berpecah belah. Akan lenyaplah rasa persatuan dan persaudaraan yang ditanam oleh junjungan besar Nabi Muhammad (S.A.W) dari jiwa masing-masing. Akan menangislah mereka di sepanjang zaman...! Akan menangislah mereka selama mana persatuan dan persaudaraan Islam itu tidak dapat dikembalikan ke dalam jiwa mereka.

Di sini suka saya menyatakan bahawa setengah daripada negara-negara Islam yang menggunakan undang-undang Barat (dalam perkara jenayah) bukanlah mereka bermaksud menyalahi *sharī'ah Islāmiyyah*. Kadang-kadang setengah daripada undang-undang Barat itu (di dalam perkara-perkara jenayah) memang bersesuaian dengan pendapat yang terkandung di dalam *sharī'ah Islāmiyyah*. Ini dapat dilihat di dalam undang-undang jenayah Mesir yang dikeluarkan pada tahun 1883. Adapun nas undang-undang

tersebut diambil daripada undang-undang Turki yang dikeluarkan pada tanggal 5.6.1853.

Di antara lain nas-nas yang terkandung di dalam undang-undang jenayah Mesir itu adalah bertujuan:


“Bahawa kerajaan hendaklah menghukum dengan hukuman jenayah di atas siapa-siapa sahaja daripada rakyat negeri yang melakukan kesalahan-kesalahan mengganggu ketenteraman umum, demikian juga kesalahan-kesalahan membuat huru-hara di dalam negeri dengan tujuan untuk menentang dasar pemerintah..”

Begitu pula saya suka mengemukakan pendapat saya mengenai

dengan pemimpin-pemimpin rakyat dan pembesar-pembesar negara di dalam setengah-setengah negeri Islam mereka menggunakan undang-undang Barat di dalam pemerintahan bukanlah mereka bertujuan untuk menentang dasar undang-undang Islam (*shari'ah Islamiyyah*), tetapi memang mereka ketahui bahawa setengah daripada dasar undang-undang yang diimport dari Barat itu menyalahi dasar undang-undang *shari'ah Islamiyyah*, meskipun mereka cuba menjaga dan cuba menghindarkan undang-undang Barat itu supaya tidak bertentangan dengan dasar undang-undang Islam mereka tak berkuasa berbuat demikian, kerana

memang sudah dasarnya pada mula walau bagaimana sekalipun dasar undang-undang Barat itu mesti bertentangan dengan *shari'ah Islamiyyah*.

Barangkali sebab terjadinya pertentangan tersebut ialah dari dua jurusan: sama ada orang-orang Barat sendiri yang tidak ada perhubungan dengan pengajaran-penagajaran suci yang terkandung di dalam *shari'ah Islamiyyah*, adapun oleh kerana orang-orang Islam sendiri yang tinggi pengetahuan mereka di dalam pengajaran undang-undang Barat tidak mahu mempelajari *shari'ah Islamiyyah* dengan sedalam-dalamnya.



Kerana tak tahan menanggung seksanya dari tentera-tentera Israel, maka penduduk-penduduk kota Baitul Maqdis terpaksa berpindah keluar meninggalkan kampung halaman mereka.